

四庫全書

集部

欽定四庫全書

集部

弇州續稿卷二百六

詳校官編修_臣潘庭筠

侍讀_臣孫球覆勘

總校官進士_臣楊懋珩

校對官檢討_臣王鍾健

謄錄監生_臣孫起鵬

欽定四庫全書

弇州續稿卷二百六

明 王世貞 撰

文部

書牘

答胡元瑞

一郵卒自西南來者得足下書累紙紙累數百千言見
懷五言十律讀鄙集七言二律他雜詩三卷生不覩鉅

麗之觀久矣何幸於足下見之而又身當之耶始者見家弟與曹甥子念稱足下已又見殷無美稱足下近得家弟一書謂縱橫藝苑中自于鱗外鮮所畏顧獨畏足下與李本寧耳本寧文筆峭峻而指竒新能出人表足下宏放奔逸若飛黃躡景頃刻千里而步驟操縱有度不至負啗決之累詩格調高秀聲響宏朗而入字入事皆古雅家弟畏之固當即令僕整幟而遇前茅不亦三舍哉而自庚午辱與本寧之尊人方伯公游其明年辱

與本寧通其又二年癸酉辱與足下尊人少叅公游其
又明年辱與本寧游而於足下尚未有通也誠不意足
下之過知僕若是足下謂詩文騷賦雖用本相通而體
裁區別獨造有之兼詣則鮮又謂精思者陋而簡於辭
博識者濫而滯於筆篤古則廢今趣今則遠古斯語也
誠學士之鴻裁而執林之匠斧也亡論目前足下執是
以程昔之人而且難之顧獨過舉以歸僕則豈僕所敢
當哉記僕初游燕中僅踰冠與于鱗輩倡和時妄意一

策名執苑不至終作吳地白眼兒足矣既稍有知識私心所慕好雖不能如執事所謂亦畧近之而中間三十年來數起數躋官中刀筆十之三家門宗戚大小十之六幽憂病苦又時錯之加以不幸負邈籍之好膏油之晷多奪而奉杯勺以故不獲盡究其力於學生平所撰述既不能自裁割彙為一帙偶失數卷徬徨廢寢適鄖中有餘梓以不携家有餘俸稍為鋟鏤置之家塾用備遺失而已不謂露其醜於足下而足下復好之也以足

下才雖過於稱僕而暫於論學乃爾僕尚何所道勉旃
深造自得而已才騁則禦之以格格定則通之以變氣
揚則沈之使實節促則澹之使和非謂足下所少而進
之進僕所偶得者而已本寧前有一信至荅之極鹵莽
行將錄一通寄彼也詩不能盡和聊成二律四絕少酌
來美廣文先生彭稚修者故是足下同盟計日相與下
上張令以惠文彈治矚氏豪彼中士論云何有便指示
為幸

又

喻蘭溪人來得足下手書及絲葛之貺念我深矣新詩
朗朗詠之令人神王僕初擬八月入茅屋三時清齋與
比丘道人共行逕已授產兒輩生平所好古典籍法墨
名畫之類悉不留阿堵中文字結習與生平故人亦不
免一刺獨足下未識面為恨耳信如來札所諭有叔夜
千里駕尚當於團焦穴一竇對語信宿也仙師化在旦
夕世外之冗遂不減塵中不克覩縷外芙蓉幄一頂戈

扇二握庶足下帷帳明月懷袖微風若與不佞相晤也
諗方校讐宋太史詩此公亦何幸然不免令足下神瞋
耳一笑

又

兩日前奉師龕入觀未暇尋三田主人僅擬息肩華胥
以蘇病骨而足下所成曇陽登真篇已及令人兩腋習
習有飛動意又家弟西筴似不以一學使為重得足下
六篇重耳氣色高華真足撲太華三芙蓉挹辮中沆瀣

近亡論李本寧不知仲默于鱗前亦有之否僕老矣擬辦兩青鞋作西歸津梁計不意中道為易遷宮所要然玄關一竅大較非異足下仙材也能有意捐風障從我游乎

又

每念海内才子如兄辱推挹以為確然國士如兄而至今不獲一見寧非缺陷世界也以書及詩授子念南而失之復以詩及書授子念北而又失之古所謂萬里比

鄰者獨於兄乎不然何也茲舍弟之江右復以扇詩及書幣往盖三易矣八月間當削迹遯世得亡與兄竟為神交之人哉有叔夜千里駕幸蚤圖之至望

又

足下聚書三萬卷挿架不減鄴侯日枕席坐卧其中世間事無足上眉尖胸次者以僕所見當今博洽士陳晦伯可稱無二然不無書簾之恨楊用修頗以綴屬稱而踈鹵百出點檢不堪自李獻吉戒人讀書當令此道彌

厄海內故不乏雋流纔一篇一叶有味便厭薄六代以
還即晉唐諸史高閣束之矧其餘者自分此生已矣何
意晚歲從少年中得足下家弟每嘖嘖足下過目不忘
髫髻時讀書幾與身等今已學亡不窺浸浸有雄視百
代意而獨稍降心於僕噫足下故劉子政張茂先輩也
僕非其人詎敢當剡谿一棹何日來東傾筐倒屣與足
下連床作十日語望之望之

又

嚮者一月內所致兩書悉達其見寄五言律十章近作
數種俱領教足下詩大抵格調高古音節鴻臙目中所
見自屠青浦外鮮偶者即老將非十萬卒憑堅城當之
未易支也唯歌行洶洶不無才多之慮小加裁損乃慚
中耳僕年事轉暮日求藏身挫名而不可得綺語作障
不減追逋所尤可恨以此身付齒舌以此日耗酌酢念
奇人如足下非一促膝晤言寓托千古亦缺陷世界也
殷無美有父喪恐偕計便亦須入弔之當掃弇園片石

以俟舍弟將入覲可同行否尊公在滇想自佳外拙詩
二章書扇頭請正曹子念亦足下意中士也因其謁永
嘉王使君聊爾相聞不一

又

喻蘭溪邦相人來辱長箋見誨副以衣履新詩種種啟
之如龍泉太阿乍出匣霜風肅然不能矐盼僕遂得見
懷及游仙十二章即異日跨一蹇游芙蓉城出橐裝以
驕毛僊翁張洪崖先生不亦大幸哉第僕之此舉正為

挫名避思朝夕焚埽冀小懺綺語宿慙耳而過為賢豪
長者描飾之又動迦禁定中蹈舞習恐終成墮落奈何
奈何所命緣蘿館集序足下方如日升川盈豈僕一語
所能定僕亦何自破筆研戒以世人理待足下而足下
意似不可已且慮後世有兩奇不相值之歎故勉而命
筆僕於交游少所推僅于鱗耳有足下于鱗不為死也
氣色高華聲調爽俊而縱橫跋扈有揮斥八極凌厲千
古意僕三十年中所接如足下真耳目中無兩所望者

思西京未雕之質平原才多之戒而已邦相無一毫俗
吏態游覽倡和令人慨想臨川之美足可紙貴見除目
尊君已復故物第碧鷄萬里不虞初平羊作石耶一笑
一笑新暑未劇加食自愛

又

辱損致全集瓌奇雄麗變幻縱橫真足推倒一世僕嚮
為足下作序僅覩計偕岩棲二種中諸體尚未備故未
以西京建安相勗今讀卧游諸作古詩樂府已深入漢

人壺與平處尚可馳驚公幹仲宣不知曹氏兄弟為何
如耳歌行如贈汪司馬等篇才思滾滾不減信陽而送
沈純父七百言氣骨錚錚並馳北地尤為當行近體自
是當世所推于鱗外首稱獨步可也僕老境何幸獲此
大觀使旋附致不一

又

生平交友垂盡何意鑿坏之日復接海內賢豪如足下
於愿足矣恨肺病方深不能竟所傾吐然與足下神交

十餘年彼此郵筒所致肝膈底裡亡不具陳所少者惟
一面耳今足下儼然而命千里之駕且云以僕故勉為
公車一出即握手片言固賢於十年衆也以僕而觀足
下詩必大家文必名家第體氣清羸宜稍節泛酌馳騫
之作四十以後必須講求出世住世學問僕今未有所
得不能相告也欲作魏茂權太常書亦以病不果夜來
囁嚅一律為錢而方寸冲冲迄未能就俟兒子止上致
之

又

久不見奇男子得足下一顧遂愈頭風屬其時尚惺惺
不獲大傾倒為恨雖然針芥相投固不在爾頃也足下
河東賦久已就吹噓上天此其際矣縱公車令不爾而
以場屋相困出囊底亦足了之知無落夾也華陽碣石
間四方豪雋雲集足下便為登壇大帥中興諸將建節
亡若岳侯之年少者艷羨艷羨倘小畢經生業障結伍制
軍約束旗鼓弘正嘉隆之業自此而三宇宙間一大快

也鞭弭中原遂有人否以報老夫屬兒子北上手筆記
存不一

又

僕有書附舍弟去而足下書附喻令之使來計其日不
相遠昔人所謂神交信非偶矣計舍弟與二賢登高醜
酒賦詩一時之盛第坐中不無少一人否僕於世故一
切抹擬不願與賢豪相接八月閉關雖聲歎不落人耳
矣如何如何初暑愁霖強飯自愛不一

又

得手札以家弟一歸為快暮年兄弟差獲聚首誠如所言僕既舉體皆凡事渠亦方治老農老圃業何敢上希皇民伯仲也陽春館之作必須了此而後焚筆研第興不易發何如必欲役丹元子為之有所未敢也一笑

又

損致新刻真如山陰道上雪後行令人應接不暇惟謬以鄙言冠之不免佛頭拋糞耳僕於足下非不極傾嚮

而氣吃詞屑不足以發近却乘興為足下作得陽春館
廿絕句或可贖茲序罪耳久已付子念不謂尚作殷洪
喬使還附致不一

又

使者來伏承尊甫先生杖履無恙足下日弄雛親側為
樂不可言山房清燕門無雜賓日坐卧四部書中游目
千秋恣意萬卷孝標士深殆難為前加以春秋甚富稍
益歲年震旦中將遂無竹素可窺者奈何僕嘗謂弘嘉

之際諸公執業亡不斐然惟博綜一途寥寥絕響僅一
楊用修而訛戾全出餘益下風恐遂成國朝大缺陷今
既得元瑞不虞此矣宇宙鴻業將來足下一人望之最
之僕老矣師丹多忘沈約耄昏何能以五鹿之角岳岳
公前也尊翁先生傳據足下原草點定成篇不能於意
外描寫如太史之傳萬石君班椽之傳龔渤海緣邇來
小有証驗方在斤慮憚於吮毫耳蹄棗種種拜領勿笑
老饕邇信陽王內翰致古銅缶一自言得之冢中貯水

加列希世珍也昔人云異物須歸異人僕得之無所用
聊以侑東不宣

又

張幼于來致足下哭家弟七言律十六章及寄僕五言
律十六章高華雄鬯整栗沈深而用事用意變幻百出
描寫如生可謂當代絕倡豈直今人不能為即古人未
易也僕嘗謂元瑞詩紀律森嚴則岳武穆多多益善則
韓淮陰至年少登壇寓內風靡非太原公子不足當之

家弟生平所推轂僅于鱗與吾元瑞今已矣人琴俱亡
不勝感慟宜足下過於用情方圖梓其遺集幸為作一
叙毋忘鄙言

又

僕故有執苑卮言是四十前未定之書于鱗嘗謂中多
俊語英雄欺人意似不滿僕亦服之第渠所棄取却未
盡快人意得足下詩藪則古今談執家盡廢矣方對客
草草不一

又

僕於文章本不能入玄解而謬為諸賢所誘輕於操管
生與人齒吻偕晚途學道又不能守綺語戒輕於操管
乃至上累師真下累良友老衰無味姓名復螫人齒吻
方欲搏頰啗指以自懲創而足下更誘之不已豈必欲
鹽車我耶足下所與論隲千載前後誠雋語僕尚稱病
未能四詩歌之喜氣浸淫滿大宅尺牘樂府擬古霍然
而起屨及於室皇矣急取維摩不二法門作小轉首乃

得解始知聞婆奏樂迦葉定中起舞非虛事也十九首
最難言離之則虞落節前輩俱所不免合之則虞捧心
于鱗亦微用為累足下加之矣唯在更利鋒巧露其質
木而已陽春館額并十六詠僕不能夷猶其間亦須受
足下一寄但日來已斷苦思俟其自來毋為日可也足
下塵尾恐不能佳偶得一柄奉佐談津不一不一

又

山中良晤殆匪偶然別後時時於松竹葱蒨間輒念風

雅而嬾放杜門不能得嚴江之掉通咫尺問衰病殘人
不堪筆研新正朔日於大士前誓斷此緣然尚矻矻了
殘歲逋而除命兩至雖寒灰無復火念而上辭疏草辭
啟無益竿尺日有三四往返殊令人厭苦奈何奈何弇
園勝賞庵有一時豪傑真足千古諸賢怯於先鳴得郢
雪倡之不虞寡和矣二酉山房日與作者揖遜念之神
王見委記係歲前面許必不敢負第小寬我俟興至即
命筆也歲書目序非不感兄見推亦寧無標榜之畏幸

且秘之去歲已作得末五子篇今錄上亦用心賞心期可也助甫中丞近有書至意服兄而甚易長卿大海從魚躍長空任鳥飛二語甚有味尊公長者而推兄之愛勤勤不已過庭之餘為我道謝不一

又

家人自處州歸者得足下手書具悉此曹子忌足下大似蜉蝣撼樹若僕則逃名之不暇而暇惜雌黃之口乎哉浙中一同人傳足下非常者初亦為駭然既而諗其

妄也僕今年六十死人口者不知其幾而竟無恙然後
來必須一實也呵呵漳南顏生踰三千里而來謁其文
慕古而未達詩則遠矣無以酌之令謁足下為小加鑪
錘可也

又

足下書凡三及矣其寄示詩藪者又再矣始而胡運副
來時值大暑病河魚且哭亡弟無虛晷一行見客即為
客所困流汗送迎襌襪報謁凌晨出門薄暮始歸歸不

暇問食且踞虎子委頓欲絕矣以故於胡君處欲作一詩送之不能其作足下報書尤不能蓋報足下書非可據案立就故也後得一書知以詩數序為急第三書亦如之足下於詩緣世定格緣格定品以故秩然經緯而至於本性之情窮極窈眇因常究變曲盡劇剔昔人所謂上下三千年縱橫一萬里前無古人後無繼者殆非虛也足下意以此序非僅不可僕生平不自愛其文即三家之社如君家釘鉸者亦且應之而今得遂以卮語

為詩藪前驅豈非至幸極快雖然兄說之盡矣何所復
贅且足下於有明作者雖極為假借以彰一代之盛然
猶不盡惜雌黃而至僕獨過垂飾獎幾遂超何李之乘
許及亡弟亦在鴈行竊懼世人之笑我以我互相標榜
也雖然僕豈敢以拙而避足下之工又豈敢以嫌而孤
足下之望旦夕必須一搦管露其醜穢足下病稍間即
脫稿上記室也今年長夏如坐熾鑪中悼逝憂生荼苦
百緒而東南操觚之客無不以詩為贅噫吁亦盛矣大

抵膚響粗備精理不足且廟堂之上往往諱言此事伯
玉不登啟事明卿永絕薦剡本寧厭厭苦塊長卿茂吳
逐逐衣食他遂無一振者大抵諸君亦微有以取之然
何至使清朝右文之意如掃也此當有任其責者足下
自愛公車之事當與免輩共之不朽大業則唯足下是
寄僕旦暮人耳無能為矣尊公萬福聞老蚌生珠甚為
慰心事然須顧惜蚌胎兩英物當益長成相見未期北
望悵然不一不一

又

前得足下書始能一報荅然謂公車已至長楊郎故付
郵筒寄之豚兒所昨忽覩蒼頭接足下黯澹片紙乃知
扶病抵瓜洲病益甚日啜粥不盡一器甚為懸情及覽
書辭見托作傳且謂病恐不可起須此文而瞑酸楚宛
篤使人腸寸寸折雖然足下年未強仕虛恬少欲何恙
不已而慮至此劇也恐拂病者意敬為作傳且馳一介
相慰問足下自愛勉進七箸鷁首且南歸見二尊人顏

色弄稚子暢其憂思行且愈矣詩藪少遲當為草序足
下不朽大業已就天下萬世知有胡元瑞矣壽夭窮達
一付之度外達磨惠能黃蘗趙州語不可輕放過也雅
貺祇領足下至此尚能為故人衣食念乎薄意附侑不

一

黎吏部

故人惟敬子

貞自丙子納節丘壑自放戊寅再辱無意人世因獲方
外之證屏處蝸廬交游盡廢雖以公之清標令望如威

鳳祥麟世所快覩而貞托在世契之末既無繇一奉清
塵又不獲通咫尺之問惟是尊公長者辱在肺腑殘歲
尚蒙記存并隸筆三字煥若神明五月從家弟所得歐
楨伯虞部寄朱王孫刻所撰夢記齒及不穀方以為奇
而跋尾則云三日而逝真夢楹之奠矣尊公文彩藝能
操行標格大率與吾吳文待詔伯仲詩並祿位過之壽
則少讓此老有芙蓉城消息矣寧能不日望尊公作寮
案也貞亦善病病輒羸削草一奠章數倦數乙都不成

語然而脫稿久矣鱗羽為虞適得戚少保便附上副以
辦香布素幸為奉之几筵尊公全集曾付梓人否刻成
見寄一部以留吾子孫也

沈嘉則

昨有姑布生求謁顧冲庵托足下先容貪欲得足下信
為發數行計已達矣比從朱君所得累紙文義燦然且
以僕所草拙序為謝而以朱君傳為托竊自惟一念之
誤落調語障筆研受役垂老矻矻不休深自厭之而不

能脫也乃於足下故所願為執鞭者即有所讚述恨其未盡何鄭重乃爾曹君文亦須撰無但足下紹介即其人長者而著作多爾雅不至令我曲筆也弟舍弟初歸人事波及甫解襜褕即勇杯勺脫稿須在中秋夜不免更煩蒼頭一來耳所示佳章領誨并海鰕之貺以佐酒即當念足下耳薄物附忱不一

又

自僕入園後少能與客相聞然至如足下故不受客例

也厨人擾擾當是王宗伯烹露葵燒筍蕨作賓頭盧供
耳質明而一蒼頭以足下刺進即馳訊家弟所艦首西
矣得書知復出甬計旦夕過由拳能與長卿偕訪否威
明雖善稱病寧為趙壹此間苦竹不深必不至作張廌
有把臂入林而已言路伎倆漸窮猥用宗伯塞白遂謗
及靈真僕齒牙餘忍也復何足道正憂此曹生作善星
比丘耳子念迫桂玉不免遠游張將軍詩為甕盎揜却
埋之豐城非足下誰為出之餘不多及

又

昨冬偕戚少保與足下高會時覺奕奕神王春時聞足下歲杪舉一雄又嗣得一雌不勝喜躍男子長貧不為害所不可缺者此事耳足下以何日過吳中當浮大白相稱快也甬中人來齟齬屠長卿至不可聞聞足下以大義持之因而牴牾大厦拉攏非一本所支朋友中不可無此段事徐吳江入臺矣偶便附此容修賀不一

周公瑕

昨有數行及先師像紬綿捧去不得報言恐去力浮沈耳黃庭內景校讐頗精計足下欣然便為捉筆兩藏妙典及近代名手幾滿一簾箱獨少壓卷者異日欲結葢珠宮一大緣勿謂道人習氣未除也休承叔寶猶在人間而不能握管意興敗盡梅花屋兩日當甚佳翠禽啁啾惱足下清夢莫更又以為萼綠華否

又

得教具悉念存之切公築室避喧數十里外春日如小

年風氣清淑於綠陰紅雨中焚香燕坐乘興對鄧尉山
色美筆寫黃庭貽王元美故人間第一快事何緣似一
葉舟兀兀了此私所未解勿謂僕以貪心作挑鬪語迫
促能事也吳君誠佳士其如得之晚何月來避客苦竹
以公書勉見之僅落穆數語而別耳殊無以慰其意也

又

僕自昨秋冬時感霜露小恙耳而為鄉里應酬所困病
羸削至春三月而始知就醫六月病瘥三日良已又七

日食微不能謹右腹掣痛如直塘所苦且作汗五日良
已則腹羸削今大有起色矣第不遇枚叔發陳琳檄耳
肖甫昨有一札云伯玉已至錢唐而不相及以為恨一
得代則呼青雀相尾訪我弇中將使我投杖而曲躍乎
今得公札信然公念我至又推食食我第果餌過豐不
無破山人例也中秋後先月色佳甚明聖之會公與伯
玉作趙武屈到而羣詩人捧盤敦以從誠大奇事足下
所言坐罵者何人雖然此湖久為絲竹粉黛所溷何異

武安侯第今其主者戚大將軍部曲耳尚不敢望田丞
相焉能使坐客無灌夫也公有意於偕肖甫伯玉而過
我弇園目界雖小根脚自大一觴一咏足令公肺腑楚
楚也昨伯起集成刻僕所草序而煩公大筆如白鹿皮
薦蒼壁愧不可言中有三誤字已報伯起改訂之矣餘
不一

張幼子

新涼方有高陽客日跌宕杯棗間而使持古阿羅漢

像至幾欲下拜以米汁供之即日逃禪室成可移奉矣
新集見委商定不佞何能為役第竊窺足下此番識解
比舊殊異百尺竿頭上一步人也五七言近體皆佳而
七言尤自錚錚態度都雅音徽清嫩時造真境七言古
絕似高岑而間有費力處押仄韻少操吳音諸銘玄思
古調得周家三昧雜文齊梁而上能以東京之質禦之
不作近代歌頭曲尾祭文甚藻奇而押韻亦不免操吳
音此或白璧之小瑕也更似宜撰五言古一二章壓卷

端何如見傳戴仲德雉經且駭且惜得無為廁鬼所引耶不然非有魏齊之迫豈以一公子難見而遽授首也然此子自謂相法星命不能過三年有一瞽者云戴君內恕耳恐不能過一年其術何神也蔡孝廉既許西館便當來贅迎之半月後可發汎彭蠡登匡廬亦何異洞庭家山水也弇園泉石殫人縱除目下得一小鎮當不以此地易之姜司成汪司馬故是廟廊之器豈闕僕菰蘆人耶足下自廬我輩胸次耳

又

得書及明卿分韻四章者佳而排律尤整麗諗且買舟
詣白下就明卿何必減郭生之於羊叔子也僕自入觀
來足跡不能一出城獨以送伯玉肖甫至清洋口而止
與明卿蟬緩夜乃抵玉龍橋宿歸不免就佛前懺悔何
能作吳閶游也子與遺集為其門人汪生郭生所佚諸
詩及尺牘祭文之類可四五卷遠不作李長吉近不作
康德涵而違負心漢乃爾宜與足下相倡酌之有所失

也石湖名勝當與游人共之昔固非足下有今亦豈徐
氏物異日質之范致能當相與拊掌大笑足下見僕弁
園記跋否一切勘破人人搏沙事事嚼蠟耳新茗拜貺
附謝

又

僕業已得請專一壑矣即不敢希補劓之隙成一家言
或庶幾抱卵之工小遂所慕而城居與囂塵接衣裾麕
集殆無已時不擾擾墨逋則徵逐書郵以故匿跡舊里

幸有苦竹畝許剪茅其陽長日宴坐一室如土狗木鷄
日進三盃糜佐少鹽蔬晚酌亦不過一二合使餘綫息
而已不謂尚存故人齒錄娓娓慰借隱囊綦履覺竟陵
之餉子暫尚為侈也所云百谷以數行見排耳報語不
中噉書又拙惡不足換羊肉如何家弟不免復罣世網
與足下相對時當不言酒食阿臬苦衷宗伯見寄一疏
草為御史解難故自超如姜司寇二君子出必有以自
見不至作僕泯泯腐草雖然饑而食則甘之如不饑者

雖芻豢亦嚼螭耳足下既時時相親亦聞其鼻息否

張伯起

昨以不能具主禮又不獲展三載契濶以是歎然足下
大雅故當不置方寸也金吾舉體金吾司空滿口司空
雖見慣者不能不嘔噦乃忍使叔度周旋其間乎僕近
驅兒子出復竄入觀中而尚不免竿尺之累二尺蒲團
面生衣矣佳集尚未及盡展俟家弟自松陵歸即付之
若糠粃之道必不敢作隔歲逋也次君得一會南陽朱

郎父子皆才人其子子厚尤可念也仰止足下甚亦有以慰藉之否

又

殘歲受役貴客却作朱修之面孔不能與足下旗鼓相當蓋至今猶恨之吳中如足下不肯就公車文子駢甫得佐大郡視若敝屣真桐鄉一絲也令長平冠軍里中兒愧死矣春寒甚忽忽擁爐幾與筆研讐近始得舒勉效佳集珠玉之導久不措意工拙既成讀之不知何語

足下為我藏拙可也仲君越游恐不能大快出門十步
外無孟嘗信陵不如足下抱膝為佳耳

王百穀

春來數從游客得足下手教旋聞有遣樊之耗所傳非
一不敢轉致候問今始悉之蒙示諸篇至古離別令傍
人一讀尚堪涕零何況作者項王拔山蓋世不能割情
虞兮足下此段抑何忍也第使不喚江郎麗覆水可再
收今已矣其斥雌顏竣勿見徐以淨名觀處之天女當

自來侍耳孤憤詩曲盡時變見贈之作奕奕有神致未能一一拈讚欲成奉荅奉慰兩章方對客不及下筆少選馳一介報謝却有所致也黃雀名醞拜貺當佐茂世半日拍浮矣辱委畫跋不免污繭却上

又

僕自東徙於竿牘都廢然至讀足下一札數行輒用灑然於靈府中下一沆瀣也比益清勝章生稱兩郎君俱游泮甚慰甚慰鄒彥吉眼中安及致此斷斷却盡為家

弟作巢窟不爾何地可着除目耶屠長卿雖過作達第
罰作鼓吏必不敢仍操漁陽搥何至遂削籍可嘆可嘆
所覩家弟白首見招小暢耳文苑中一段蒙氣尚未豁
天日也足下所稱李本寧固自宜爾楚衣僂行少年固
已尾之一着朝士服即攬其袪矣僕在人口過活一世
晚始小自由解弢隳裘以了餘日木食草衣覺輕肥之
瞠後此味願與足下共之聞談思重日駕艤符縱飲吳
市橐中裝尚可作萬人供何至如足下云負郭不能半

蘇季子審爾即使日噉脫粟僅堪活七人半耳呵呵

又

扇頭二律精切婉麗於煙霞中作情事語我世尊雖開不二法門不能不為破顏也僕本羊腸服箱款段疲極思息借此以逃諸賢不察以為類有小得者每一循省若負芒刺春來多香火客羅雀之門剝啄不已公結語莫種五陵花微旨宛然僕方苦之終須被髮入山耳朱在明云公乃虞及桂玉甚訝之讀五庫書翫古金石丹

青亦足自飽必不至作原思趙壹也吳生誠佳士如來
諭所恨得之晚僕轉從兜曹丐衣食度日貴人竿尺盡
廢何以慰之

又

扶病與公相見惻惻如不能續語公殆季梁我矣別後
漸自能起小輔以藥食覽鏡欣然覺形神復親公知之
當為一快也久旱將雨公所謂坵牖晚涼西山爽氣故
自佳尚未及田家停桔槔濁酒相命計歲功之為親切

也何觀察所致新刻不足言獨僕舊於周氏錄得游山
記四鉅冊久滯渠架今始歸我恍如見故人矣章生舊
携一札書云致李使君者不言是何人今知是觀察即
達之矣扇頭絕句附去非敢相誚欲公於方寸中覓普
陀落伽真境耳一笑

又

二詩具見風人之致至及屠孟卿則忽懼然憐之與恨
政當各半耳僕六時晏坐澹然無營足下嘲我未能遽

焚君苗筆研筆研故當焚但世無士衡以此二物得小
延第令生塵若史雲蓋可也吳幼安乃能念僕但僕覲
顏偷生言及懸弧腸寸寸磔安敢當賀即足下以孤山
例訪我雖謝客尚能具濁醪脫粟以待不然者索我東
海雲氣中矣

又

自春徂夏得足下書凡十餘紙而不能一荅報緣以足
下書紹者一見而目為筌蹄絕去不復顧膏肓之嬾當

亦任之知不謂我薄也邇來賤體頗健但山妻暴感末疾賴盛三從鬼門奪回今尚是牀褥中物瞥見兒女憂悴之狀令人忽忽鮮生趣知足下有意外事處仲終是英雄不與季倫同趣何時過我當以搏沙一觀銷之今年宗伯用御史言先君子得沾上恩僕可藉手下附聞不一

又

夏中出門見皂衣人致足下一書及食物二種尋令人

跡之不可得矣聞足下近有微恙旋已勿藥周郎發矣
何不汎輕舫出京口指燕磯而上窮秣陵花月之勝乎
僕自二月失計別猿鶴日就籠檻方欲起治城之鐵以
鑄錯而前閏十九日忽得亡弟訃駭痛絕倒次日遂成
疾覺疾轉甚今尚在湯藥間念昨冬賢兄奄逝足下損瘦
至不可識認然足下深友于之痛而僕則兼知己之感
足下唯傷逝之悲而僕則兼憂生之恨且僕長於亡弟
十年矣餘日之幾何乃遘此事痛唯亡弟名行粗立雕

蟲之技著於宇內中歲頗收循吏之績晚節頓悟無生
之旨三兒嶄然僅一小者未見頭角耳所恨年不配德位
未稱才流唁盈朝含軫同志已矣獨冀得足下一誄或
小傳耳僕過聖誕後當上書乞骸歸歸即料理塋事俟
行狀脫草方敢踵門拜請茲則未敢也病中欲成一奠
語尚不能僅得廿四絕句辭不倫類聊附足下一讀之
伏枕口授不一

又

得足下手書知近有霜露之恙旋已平善長卿一賦能
腐毫而聘茂陵女宜其消渴也足下倚馬千言故未至
損靈府然造物善妬才多以尤物中之幸自消息勿落
彼度內僕長於亡弟十年尚鼓棹苦海與鯨鯢作敵耶
業上書乞骸骨足下當候我於楓橋烟雨間矣馬叅軍
佳人也而未足妬乃亦奪之遺橐蕭然幾無以殮僕亦
小效脫駢之賻渠遺言娓娓以志銘見托須足下先狀
之故爾談叅軍病卧旅邸大是遼落今似可起矣僕亦

再過之不能如劉丹陽甘輕薄尹足下何自有三至之
疑乎傳街中盛行謀野集乃不以相寄無慮中郎談進
也一笑

弇州續稿卷二百六

欽定四庫全書

弇州續稿卷二百七

明 王世貞 撰

文部

書牘

荅王少卿

昨春吳瑞穀來以其所撰集求序去而謁劉子威知其必針芥合也果然矣今讀足下集序則賢金玉皆其門

人也而辨香乃在子威子威序足下集時露嘆惜夫足
下於瑞穀有出監之美於子威有當心之嗜一伯牙而
得二鍾期何所復藉不佞而卒收之也足下文追琢太
始於聯綴摹寫當推獨步大約古句十四古字十六篇
法雖小遜時時叅伍少須於元精真機中更一番陶冶
蹊逕應自絕矣僕筆研宿障老未盡祛受役於人無足
道者子威人便附此不悉

余中丞

世貞托在宇庇而以習嬾成癖一餐是耽雖日佩威聲
沐德澤而竟不能一納履於交戟之下自前者僅修赤
牘之後亦不敢以寒暄無益之談博長者德音踈濶之
罪復何可逃世貞與三吳諸士民鮮腆不德以致昊天
降割淫霖肆毒即以敝州言之花居十之八而流潦所
停根莖萎爛其禾稻之在西與崑交界者皆滙為巨浸
矣聞門下具疏為民請命不勝感激但聞諸司理來云
敝州以稍高阜擬次不知潮長平岝水不即下花之禍

殆甚於水鄉之禾稻也伏惟明公一賜哀憫更有薄計具別楮并希照亮

又啟敝郡為二相桑梓之地其受禍之真切與不忍之情尤有甚於僕輩者但自趙司成被詰不無避嫌一念而具疏者獨兩臺恐上意以為常套不相體察自難執請鄙見以為臺下可諭指道府各報水災使飛章疊上上意必為動或召對或賜問可以情實告即司農亦不能為梗矣僕在湖州分守時與郡之黃守同上疏荷蒙

聖澤所寬卹比之嘉杭三倍此隆慶已巳年事也全荒者請賑次荒者議蠲若改折及存留寧可使部覆不可此間發端唯臺下裁之餘不敢贅

荅穆考功

僕雖以引疾予告而復為世人所跡蝸廬剝啄無已故徙居深落一切謝絕獨於生平故人如公與闕二三

君子時時動方寸蓋無何而使者至矣所論皆自肺腑語使我恍然如登遲鴻之臺而被穆如之灑也讀百將

提衡足使兜牟喚醒人人韓白弟不令棲岩飲泌之士
思隳解其弢褫耶公詩律雄渾奇崛所當無前唯小洗
滄氣足使唐人退舍目前無足難也蒲坂餘烈尚能鞭
箠少年作被羽先登今似小屈矣廟堂名為急材而材
如公乃猶在擬議耶前見舉世所推龍門之鑑而尚疑
公太縱橫者僕謂行千里而棄赤驥策蹇驢古人所歎
今得無再哉強飯自愛終不但使唾壺缺也杯筆既是
恩賜何可脫贈使抱純鉤子母之憶又不敢虛公至意

抵暮呼兒輩三舉每舉僅二分蓋已與米汁緣斷故也
嚮托何序緣以徙舍廢書籍久忘之幸賜示已為公畧
破酒戒復當破文戒作數語不然糠粃於百將提衡可
也詢使者知賢子日從事執文甚快適有建昌一宗王
惠松雪齋大士像并題署皆精絕輟為維摩丈室之供
餘土織將意麾置是荷

又

自石丈之司同與王兵使之在事得再三相問訊嗣後

間者濶焉不謂乃有劉長洲天假之緣以吾丈之書至也蓋宛然若面矣弟所草記序小有致若二古詩激亢用壯殊媿大雅吾丈何緣盡登之石陳生筆意可愛但不當下贅某體某體作蛇足耳鐫去之可也刻手與搨工俱佳河北乃有此三絕吾丈詩賦矯矯宏麗勒之高臺不與繁叢嘯吹相雄長耶新正卒忽多事不能盡和聊和其奇石歌一章以報來美弟之本末具石丈書中不足滿達者一粲也每讀少陵句世人皆欲殺怪其過

甚今得無類是耶弟此曹子不善妬如吾丈與僕乃當
妬其不出耳山園偃息自佳何必絲與竹山水有清音
此弟素尚而乃以為有聲色之奉亦大可笑事也趙選
部見念似以二君子推及不然孔北海知世間有劉備
耶幸為致聲謝之所喻云云不佞豈敢當三君子鴈行
昨聞歛士有選拙詩文與于鱗並傳者止之恐不得也
此書成當又增一番側目耳不腆之敬附函不一

又

劉長洲所復拜尊丈手教衣紬之賜及諸石刻種種具
俱見念之深與林居雅況令人躍然起色思御風而登
遲鴻臺也不佞少年齒舌中人也吾丈獨汰羣論而修
飾之使資萊登於椒蘭之上雖然不佞心跡尚恐吾丈
與東泉丈之未釋然也不佞自束髮以來叨玷仕版持
法骭骭與權邪觸屬先公大故恨不獲從地下然三年
之內何嘗茹葷御室十年之內何嘗具衣冠預燕會近
三十無子先君為置二妾有三子其二妾之一存者今

且老矣房櫳閒然黛粉削跡生平鮮絲竹之嗜臧獲守
先戒無一人曉聲律止是曩昔於蘭若西創一閣安兩
藏經前樹茅舍修竹環之鄉有廢圃餘峰石之類徙置
其後成池中一島小草之日付家僕幹為增築東西二
坡歲益月增水樹橋榭頗稱奇勝生平好古圖籍及諸
書碑刻至脫衣鬻之不惜米汁為累旁及鎗壘此外了
無所涉然家帑用是垂罄兼以原田無歲催科迫急所
愛之物時時入質庫與人共之年及耒榆欲與兒輩築

一居址尚未就而世猥以江東富人與游閒公子見目
良可笑也且僕之所繇致毀可指數也其始在楚棘偶
得講學諸君不可意事因發策偶及之非謂講學之
不宜謂徒講學而不修行之不宜也而一時言路有切
齒者矣其後在鄖無事自惜敝帚恐有散佚姑梓之梓
而復為二三知己所強遂出之少年腸肥腦滿不能盡
持國老之論彈射所及更成戈矛僕嘗偶語門下生未
有抵吾州而不游弇州園者然退而致譏者不少矣未

有抵吾州而不需弇州稿者然退而致恨者不少矣業
已成矣付之無如何而已杜門一載宴集稀簡流光忽
忽每自悵然為七情所傷根器已損不得窺古先生守
藏史之藩何暇斷斷鳴其不平特以吾丈與東泉丈知
已也丈夫不於不知已人稱屈不得不於知已人求伸
二君子苟一信之可以瞑目矣拙詩何幸得與大篇並
傳扇頭之句所謂形穢者非虛也和竒石歌押文字乃
久字之誤幸正之東泉丈以子病至廢筆研可駭不知

是前時在大理所虞者否劉長洲初至頗悶悶近傳神君之政遂冠七邑名下固無虛士也長君書筆遂逼乃公第得之率更為多小和以晉法庶異日對金馬勒燕然足傾倒世人耳初冬尚暄為道自愛

又

前有一書附劉令人去計已達矣茲時已知石丈主器病篤甚為懸憂舍弟自覲歸云見趙吏部稱病者已不起石丈痛甚無以聊日須趺生解之而吾丈方極意劇

刻千秋之業不暇從此生周還弟自入春小有信解於
眷屬一緣洗垂盡乃為石丈數起念至寢食俱中廢也
渠所遭若此雖蒙莊叟維摩詰解不得惟吾丈乃解得
蓋情感之極精理所不能勝當暫以粗事勝之可耳弟
山園日佳古文金石名畫日益臨歧一物將不去讀書
五車著述千卷亦覺臨歧一字用不着以故盡從屏謝
且別創小茅舍作頭陀行逕耳同志者王宗伯元馭也
家弟以病乞休而不得遂世緣固未易斷耶賢郎風氣

適上石丈遂無此世界缺陷信然信然

又

歲晏寂寂而嘉定令自魏來者致吾丈教言滿紙誦之
皆肺腑也新詩比舊骨格大成長而情事復隱愜乃知
十年前提婆達多是吾丈大善知識也驟見賢郎書且
駭且快不敢論右軍抑懷仁比丘復出矣以賢郎筆筆
吾丈詩真足雙美梁車十二乘皆在光攝敬服敬服第
僕有百尺竿頭一語輒敢奉獻吾丈不可無內擲隨語

琢磨必令入無間賢郎不可無外拓隨手變化必令徹
無體不涉門徑不墮階級乃可卓然名家若圍圍故步
大者江淮間句踐小則夜郎王耳弟自正月偶有聞十
月守一關一切身外事悉從末殺幾欲舉書籍筆研付
之祖龍而至報吾丈書起色隱隱現毫端乃知叅合文
類無明夙習未易除也近草得曇陽仙師傳附覽此殆
非師意竊恐世口世耳張大苛擿皆不能經故以推語
破之即得罪弗敢恤也邊鎮之說得非尚欲犧牲我乎

弟雖夢中亦不作此境宇宙廣矣隨地可埋骨非吾丈
與拱辰不敢遽以告也元馭瑩徹如水玉況是上真眷
屬足可依更一有氣力者持之吾事庶有濟哉雅貺拜
嘉薄酌不足以當玉案聊見情耳沍寒自愛

又

月前有鄉人馬材官使滑附一札及刻佛道經數種致
左右計已達矣仰間忽拜手翰及扇頭新詩之貺讀之
若灑甘露而被芳颺也忽不自知煩暑矣念自前歲杪

賣身精廬尚不能忘故人以四絕句報足下又作四絕句為石丈夢蘭之祝托高嘉定上之今讀足下與石丈書了不復相關得非作洪喬浮沉故事耶劉長洲致所梓明七言律選覺虹色繚繞蓋圖窮而匕首見矣何雄麗精切若此此書成於近體可作大指南足下金篦之力非淺第僕乃亦濫竽與三君子方駕恐不得志少年以偏嗜訾足下耳國初諸賢淘汰覺太嚴如高李廸雖格調小降其才情足以掩帶一代或可加益否八句有

歌行數章又落韻有傍出者夫律者律也抑或可少刪
否伯子書法每一見輒一大奇進足下詩既凌駕開元
伯子書復彷彿永和河朔二僖父縱橫若此吳子輩於
何處生活僕老不足言恐家弟亦不免衛夫人泣耳騏
兒老大落魄今雖游場屋焉敢希尾騏驎也所喻欲於
諸著作為糠粃之導前者為凌子所強了此宿障極不
足汙爾當從容圖之拙詩二章足下試目之知其忘言
於工拙也

又

三月中三得書皆肺腑語而最後以豚犬獲廁賢書為
踊躍不寢誠哉通家之契固如此也弟懷然之況殆盡
東泉丈書中而猶有不能釋然者賢器尚爾暫蹶燕楚
齊蜀吳諸錄至于鱗明卿肖甫助甫元馭諸公子皆寂
寂即不佞胡心獨懼趙大叅何以拂衣將欲從二君子
鼎足吟社耶抑有所不足於目耶台垣易曜蒙氣猶然
封殖之厚則不止一人矣東南沴厲異常陽侯賈虐敵

邑數武之外目不忍開如何如何足下與東泉仁心為質恐不能忘世慮也劉長洲覲便聊此附謝并布不腆統祈照亮

張見父

前聞足下有都下行作選人也已而選人目無聞也將厭其折腰五斗米耶長公飛而食肉立功萬里外足下代操文管於汝南月旦之地何必減驃騎矣僕生平於出處不能無愧跡然自強為山公所黜耳未嘗一經由

僕意也好山水不能徙家家焉而謬為一島一池以自適
罪一好圖籍不惜裝橐以致判產罪二好為文文不能
厚匿諱而時有所持衡罪三好客不能以惡草具進而
身亦緣而負酒食累罪四此四罪誠有之若謂僕耽聲
色娛財貨居閒請托如濁世公子則似更有一人也度
足下久悉之不宜及所以偶及者亦為此月旦地耳長
公命使裏三月糧盛暑始抵吳以酒資資我以甘果餌
我方寸五嶽驟起不平寧若秦人視越人之肥瘠也金

陵諸賢撫撫真可畏然此曹晝伏夜動作壁鬼耳一語
攝之立消不足言也適有小兒婦父沈商城便附此不

一

王光州仲叔

昨諗門下以公除入朝復補舊垣因得閱治河大䟽鑿
鑿中窺且承須校文之命不任浣慰然未幾而蜀垣之
除目下矣內意非所敢知第大丈夫入則為長孺之拾
遺出則為淮陽之卧理龍德變化故非常情所可測也

世貞衰遲過時之人強顏一出觸目尤悔加以亡弟太
常大變神魄衰沮小有建白即懇疏乞歸而踈濶亡當
用事者既迂之而又尼之不使之得遂一去之願進退
維谷方在彷徨而使者將手教至尚欲引之於非分之
地藉令僕尚有此念藏書萬卷儘堪紬繹比之孟堅僅
少子卿叔皮遺撰耳豈必石渠乃繼南史所恨十載蒲
團釀成衰朽皮骨於出處兩義俱墮如何玉現集遂與
赤城霞色爭標不知伯玉序重公抑公集重伯玉也太

華舊有于鱗記奇古而少發揮王履道詳縷而讓裁翦
公於斯兼之矣然峨眉聲價寧下太華既以僻遠不登
秩祀何自復缺公記使岷巴氣短耶幸念之僕過此殘
臘當再圖歸計耳雅貺祇領附有薄報不一

又

僕海濱鄙人也雕蟲自晝晚未聞道獨幸此生當少時
得幸於尊父司寇公已而盡竊其微言讀之已又獲讀
賢從給事君之持論篇什已又從白下與次君職方游

所不滿者不識公與叔子耳今者一日而邁公所著浮
弋草讀之如司寇公也儼然若周還滄海之若而覩赤
城之霞出沒也不亦快哉叔子計當亦不遠也大篇有
響有象有色有格有情有調稍加沈穩即開元大歷諸
家不足畏也中州召父之業成圖書旦夕下矣倘肯有
意乎吏隱哉鳩鵲鳳皇之勝龍蟠虎踞之雄與次君相
披覽僕雖老尚能操七寸不律以從也雅貺不敢辭聊
有薄物比於縞帶亮之亮之

馮咸甫先輩

春時得接足下清範而甫受同事者約不能有所繾綣
自是闕焉不聞問空谷跼然則使者以德音至矣乃知
見訊之素為河伯所窺大篇殷殷金石聲不妨晚合諸梓
無非夜光而七言猶自超音象鴻爽才情調暢要當於
岑李錢劉間求之別致時義典雅精潔殊堪程式適家
弟入觀與王宗伯晤而出相證咀歎無已既稍各露其
見以骨太勝味太玄欲小柔雋之不識可否僕老矣坐

夙生障少而負雕蟲之癖受役筆研狂怒猗走垂四十
年姓名忍人齒頰而不自覺近始愧且悔欲於古先生
前一懺洗之今足下乃以同嗜而謬加飾獎至舉昔賢
之所灼然而鳴一代者相擬則非所敢任也夫材不難
專詣而難兼工評書者謂逸少正隸天然不能如元常
草行工夫不能如伯英而以能撮二子之長為勝今足
下復以此勝理許我言大又非所敢任也足下材甚富
年甚少力甚強將無異日逸少乎僕雖陋何敢作衛夫

人泣抑以僕所見有屠長卿胡元瑞者其人秦楚賦也
足下悉甲而臨之於大陸之野為百尺壇進盟盤握牛
耳不亦大快事哉而以媯不佞唯有走而匿之洛陽之
責臺耳小律一章非足以酌來美足下但憐其破例可
也斐几甚適所需但嫌於過麗不稱瓠壺瓦研耳

又

往者得足下詩而快之遂已命筆而適有阻者亡何病
瘡且病腹痛而談客偶及今絳灌事氣不能平湯借足

下集發之既已付使者而後讀則甚悔毋論其所標許不能當足下已也足下業已付剞劂則無及矣徐澤夫刻此經意甚佳而書梓二手都不稱第因足下寄惠得徧施僧俗知大士緣起不至作優婆夷觀足下功德固不淺也僕羸弱惛惛意不欲生而徵文者不減爾日催科吏念廷尉京兆傳非可草草塞白且於京兆籲代一大事此中若攢芒刺愧痛不可言以是筆促縮而不忍下然終當為足下一強決之也汪司馬墓道之諾踰年

矣今聞其旦夕且至意甚卒卒過是則小寬耳章子敬
近況何如為致聲不一

又

僕自春夏交困邁軸勉強從事筆研都無復生趣然尚
能閉門任剝啄蒼苔縱橫成理而抵中秋稍稍肉骨會
伯玉肖甫相繼來元瑞與汪氏二季佐之浹晝卜夜都
不甚疲然自是遂無繇謝客筆研障轉益深嚮者稱責
進今殆似阿鼻獄矣念廷尉公僊游則已久而京兆公

方萬福又此題不易措手故稍遲遲今得教乃爾又似不可緩此月盡或可脫藁使者但以孟冬之五日來可也錢塘望夕大似蓮花會俱云為魔波旬所嬈要是缺陷世界足下乃以為美耶珍味拜嘉附謝兒子歸已六日附聞不一

又

方末殺世情而故人間入念乃忽得手書及近作殊足慰契濶扇頭見寄之什尤便清令讀之灑然小俟有興

或能奉和也越游記叙致波瀾當與賢叔父貴游差池
所上賢叔父書始知足下大憂桂玉然尚有生氣不至
如柳州叙失意落莫牢慙耳吾家阿大不曉治生時復
有公私責將來恐亦不免上叔父書兩措大關貧何減
馬宜甫也元宵前後僕實不在城應門者亦不以刺相
聞足下故當相亮廷韓得無疑其拒客否便見題凡鳥
亦自甘之兩日前為海寧寺僧明因作足下書修殿緣
募足下室如懸罄豈敢以檀越相期或借重於鄉之善

智識可耳與太原公作姻家故自佳若辰玉則足下之
裴叔則衛叔寶也太原之欽尊公長者不啻口出足下
知之

王泰字先輩

昨春為病魔所侵幾遂遊岱賴公妙方以起八月至四
月食息無苦神氣亦王念多生叅合文障受役世人靈
腑一寸耗磨不休殘日幾何刺促向盡以故新正於佛
前誓斷之而所授宿逋至今猶在墨瀋中浮沉過夏則

為無事人矣公既起我而又不忘度我所示皆秘密藏
僕舊聞約畧無異春時偶蒙警戒欲捐此殘缺之軀專
事心境以證來果今得公教如發蒙矣便當一意行之
耳淮漕李中丞故賢者今屈公得無有世外之慕乎尊
翁比益康勝有大茅君在何慮不百歲大貺渥疊几杖
之愧也薄效非敢足酬聊見相與之情使迫口授代面
不宣

光先輩

足下黃元甫之友而于鱗先生之鄉人也其見存僕固
宜僕於雕蟲技殆夙生障耳汨沒者垂四十年所損筆
札以千萬計而於道無所發揮此番叅合之化不歸將
來何所底止以故居恒瞿然懼焉幸而吾師憫之示以
金篦俾出迷途而返之正然且五年矣而塵債不獲却
塵念不自洗行則僂僂止則兀兀與接為構日與心鬪
何以探天機而備純白哉不獲已赤身從二童子走鄉
落携佛道書一束單蔬半菽隳體塞兌以俟師期而已

不然即槁死毋悔也足下之書辭甚奇念甚殷而旨甚
玄妙第飾獎亦甚過僕混沌久潰亡所虞鑿將不使萌
見獵心乎哉銀環一竅先師秘之僕既無所知不敢強
對然葱嶺苦縣終始如一中間機用小貳足下固已近
之亦何煩置喙足下所引陳王二先生竊謂白沙識處
高陽明用處高用高矣恐不免為高所累又不知二先
生於來處得透徹否名根得歸盡否何李無論于鱗在
今日恐亦未能舍而從我蓋此君於所好已深而所自

居大是故也足下與玄甫皆困羊腸而足千里者平津江都故非小年人第不欲以腐鼠相嚇勉旃為道自愛

阮先輩

前者與足下別方困俗冗寢溲不得間以故不克具杯酒通殷勤既足下行後復拜書幣至以其詩集成屬不佞序不佞得稍稍卒業其辭氣跌蕩不羈累數百言而才未盡中間儁語傑思時時足名世而疵累故不能盡洗甚或近體有失嚴者有走韻者既陸生任其筆削當

無復憾第吾聞前輩徐昌穀始與文祝諸君倡和既斐然矣見獻吉而悔盡棄之及詩成自選成帙所謂迪功集者是也迪功亡鄉人不解事刻其別集外集數卷而名小挫矣僕今雖勉為足下序異日不朽之大業成將無悔之乎使還附序稿去并有別侑希鑒入

陳李迪

昨雨中辱高軒見枉倉卒未竟所欲吐而足下雅言亦似在吻索間不能畢退而讀扇頭之贈則見托良深大

書四幀詩氣清而調逸書亦遒勁稱是卧雪齋記古色
爛然中間宛復深至恍然歷下復生二祭文絕得昌黎
意而左史之筆又勝之足下才非僅閩士才也若以此
調趣世恐亦非世眼人也公車之業少自貶損何如諗
今日謁太學元旦當暇過此一談薄物非敢云贐以贈
縞相例耳不一

與胡觀察伯安

憶自癸酉之秋別公黃鶴大別之間今復覩癸矣自惟

春容大雅使人如醉醇醪忠信寬博天下信其為鉅公
長者而世鮮推轂不登三事良可慨歎第此浮榮耳來
教所云年逾耳順而鬚髮無一莖白此便是實際實響
僕雖差少於公而衰態畢露故於仙師前朝夕焚掃冀
一懺之而障深業重殊自杳然何能為公役也令子天
士國器舉世不能二三明公有餘不盡之留富矣美矣
蔑以加矣過庭之際幸為致聲不一

又

公子元瑞至知有美璋之慶僕於時快甚不暇作寒暄
語輒呼酒飛大白數十巡坐客亡弗傾倒甚咸謂公厚
德宏度故宜有此既元瑞北上歸過我弇山則聞大慶
再矣僕之喜可知也每歎元瑞雄才絕世然亦頗憂其
為造物所忌今而後明公可枕暮年萬事當毋問矣孟
嘗君崔信明咸以五日生一聲冠唐初一譽隆戰國令
孫以是日懸弧天意瞭然公子旋附候不一



弇州續稿卷二百七